

Allanguutissatut siunnersuut

Uunga siunnersuut: Aningaasarsianit akileraarutit pillugit Inatsisartut Inatsisaata nr. 12 november 2006-imeersup allanngortinneqarnera pillugu Inatsisartut inatsisaat nr. xx, xx 2017 -imeersoq

Naalakkersuisuninngaanniit pingajussaaniigassatut saqqummiunneqartoq.

§ 1-imut

1. § 1-imi, nr. 01 nutaaq ikkunneqassaaq:

” 01. § 36 a, imm. 1-2, ima oqaasertalerneqassaaq:

”§ 36 a. Aningaasarsianit akileraaruteqaataasussanit naatsorsuinermi, akileraartussaataitasut

1) inunnit inatsisitigulluunniit pisussaataitasunit aalajangiisuusumik aqunneqartuusut imaluunniit

2) inatsisitigut pisussaataitasunut aqutsisuusut imaluunniit

3) inatsisitigut pisussaataitasumik suliffeqarfissuarmut attaveqartut, imaluunniit

4) nunani allani aalajangersimasumik ingerlatsiviutilik, imaluunniit

5) inuk inatsisitigulluunniit pisussaataitasoq nunami allamioq Kalaallit Nunaanni aalajangersimasumik ingerlatsiveqartoq il.il, takuuk § 2, imm. 1, nr. 10-miit 12-imut, matuma Inuit, inatsisitigut pisussaataitasut aalajangersimasumik ingerlatsiviit ilaalu ilanngullugit Kalaallit Nunaanniittut Kalaallillu Nunaata avataaniittut qulaani taaneqartut niuernikkut imaluunniit aningaasatigut nuussivigeqatigineranni (nakkutigisaasumik aningaasanik nuussineq), illuatungeriit attuumassuteqanngitsut akornanni nuussineregaluarpat angusarisinnaasimasat naapertorlugit akit piumasqaataasullu atorneqassasut. Nr.1-imi inatsisitigut pisussaataitasut imm. 4-milu ingerlatseqatigiiffiit peqatigiiffiit assigisaasalu inissisimaffii assigiilersinneqarput, Kalaallit Nunaanni akileraartarnermut inatsit naapertorlugu akileraartussaataitasut taasaanngippata kisiannili pissutsit ingerlatseqatigiiffiit ingerlatsineranni maleruagassanut, ingerlatseqatigiiffiit isumaqatigiissutaasigut imaluunniit peqatigiiffiit maleruqqusaannit aalajangersarneqarpata.

Imm. 2. Nakkutiginninneq matumani paasineqassaaq piginnittuuneq taasisinnaanermulluunniit pisinnaatitaanermik atuisinnaaneq, tamatumani toqqaannartumik toqqaannangitsumilluunniit aktiatigut aningaasaatigisat 50 procentii sinnerlugit pigineqarpata imaluunniit 50 procentii sinnerlugit taasisinnaassuseqarnermi. Akileraartussaataitasup inatsisitigut pisussaassuseqartumut nakkutilliisutut isigineqassanerani, imaluunniit akileraartussaataitasoq inummit inatsisitigut pisussaassuseqartumit inummilluunniit nakkutigineqarnersoq naliliiffiginninnermi makku ilanngunneqassaput:

1) aktiat imaluunniit taasisinnaanermut pisinnaatitaanerit, suliffeqarfissuarmut atasuusunik ingerlatseqatigiiffinnit, imm. 4 naapertorlugu taasat, aamma

2) aktiat aamma taasisinnaanermut pisinnaatitaanerit, inunnit aktiaateqartuusunit qanigisaannillu pigineqartut,

3) aktiat imaluunniit taasisinnaanermut pisinnaatitaanerit, aningaasaateqarfimmit imaluunniit

ingerlatseqatigiiffinnit kattusseqatigiiffimmit piginnittuusumit namminermit pilersinneqartumit imaluunniit ingerlatseqatigiiffinnit suliffeqarfissuarmut atasuusunit taaneqartunit, qanigisanit il.il. imaluunniit aningaasaateqarfinnit taakkuninnga pilersinneqartunit pigineqartut ilanngullugit naatsorsuutigineqassapput, 4) piginneqataassutsit taasisinnaanermullu pisinnaatitaanerit, ingerlatseqatigiiffimmi peqataasunit allanit, ingerlatseqatigiiffimmi peqataasup atuinissamik nakkutilliinissamillu isumaqatigiissuteqarfigisimasaanit, pigineqartut naatsorsuutigineqassapput, aamma 5) piginneqataassutsit aamma taasisinnaanermut pisinnaatitaanerit, inummit § 1-imi ilaasumut pigineqartut, qanigisat imaluunniit aningaasaateqarfiit taakkunanga pilersinneqarsimasut peqatigalugit”

2. § 1, -imi nr. 02-tut nutaatut ilanngunneqarpoq:

” 02. § 63, imm. 2, ima oqaasertalerneqassaaq:

”Imm. 2. kommuninut ataatsimut akileraarummut procent akileraarutissaq Naalakkersuisunit, kommuninik tusarniaareermermi aalajangerneqassaaq qaammatsiutit malillugit ukioq akileraarutip atuutilerfissaa sioqqullugu ukiup affaani siullermi Inatsisartut ataatsimiinneranni.””

Oqaaseqaatit nalinginnaasut

Siunnersuutip uuma siunertaraa inatsisitigut toqqammaviliinissaq susassaqaqatigiit Kalaallit Nunaanni niueqatigiissimanerminni avitseqatigiinnerminnilu atugassarititaasut inissinniarnernani, inissiineq taanna tassaassasoq susassaqaqatigiinngitsut iluminni niueqatigiinniarunik atugassarititaasunik inissiiniarnerminni inissitaasa assingat (Attuumavallaannginnissamut periuseq), taannalu aallaavigalugu aningaasarsianit akileraarutaasussat nalunaarsorniarnerni akissarititaasut atugassarititaasullu eqqortut atorneqarnissaat.

Pissutsit malillugit maanna aalajangersagaq § 36 a aatsaat atorneqartarpoq, Kalaallit Nunaat nunallu allat iluminni niueqatigiissimatillutik, taamaattumillu aalajangersagaq taanna Kalaallit Nunaata iluani niueqatigiittoqartillugu atorneqarsimanani.

§ 36 a-mi atuuffiup iluani killiliinerup tunuliaqutigisimavaa, naatsorsuutigineqarsimagaluarmat nalinginnaasumik akileraartarnermut inatsimmi akileraartarnermut oqartussaqaqfik susassaqaqatigiit iluminni attuumavallaannginnissamut periuseq atornagu niueqatigiissimatillugit aaqqiissuteqartoqarsinnaasoq.

Aningaasarsianit akileraarutit pillugit inatsimmi § 13-14-imilu aamma allaqqavooq aningaasarsiassat akileraarusigassat taakkuussasut nammineq isertitat, taamaakkaluartorlu aamma aningaasarsiat akileraarusigassat tamarmik akileraarusertariaqartut. Taamaattumik susassaqaqatigiit iluminni attartortitsisoqarsimatillugu, erniaqartitsineq eqqarsaatigalugu

arlaatigut eqqunngitsoqarsimappat, tassa isumaqatigiissut taanna susassaqaqatigiinngitsuninngaanniit isumaqatigiissutaasimasussaagaluartumiit allaanerussuteqassappat, taava erniaqartitsinermut attuumassuteqartut aaqqinneqarsinnaapput. Tamannalu pisassaaq pineqartoq arlaatigut isertitaqarsimassappat – ernianut akiliutaasussaagaluartut akilerneqannginnerannit.

Aammattaaq Naalakkersuisut unioqquitsisumik akileraarutinut akiliisoqartarneranut atatillugu suliainnut siunnersuusiortoqarnerata nalaani paasitinneqarsimapput, eqqartuussiveqarfiit qullersaanni eqqartuussisoqarsimasoq, taannalu aallaavigalugu pisoqarnerani pisassalinni ernianut tunngatillugu aaqqiissuteqartoqarsinnaanera apeqquserneqarsimalluni (HD af 11. februar 1998, gengivet i Tfs 1998.199). Eqqartuussinermilu inernerusumi tunngavigineqartoq tassaavoq qallunaat pisortatigoortumik akileraartarnermut inatsisaat § 4, taannalu Aningaasarsianit akileraartarnermut Inatsisartut Inatsisaata §§ 13-14-ip assigivaa.

Pineqartumi sammineqarsimavoq, pisassallip erniaqartitsinermut atatillugu akileraartartup isertitarisimasaa, illunik attartortakkanik piginneqatigiiffimmuut tunisaqarsimanerata kingorna, tassanilu piginneqatigiissutit akileraartartup nammineerluni pigisimavai. Pineqaatissiissutigineqarsimasullu annertussusaa apeqquserneqarpoq.

Akileraarusiinermik aalajangiisartunit aalajangiussaasimasut marluk saqqummiunneqarsimangitsut 2004-meersoq 2011-meersorlu aallaavigalugit piginneqatigiiffimmi piginneqataanerpaaq ingerlatseqatigiiffinnuut attartugassarsititsinerminut atatillugu erniat naapertuutinningsut aallaavigineqarsimaneranut atatillugu pineqaatissiissutigineqarsimasut inatsisitigut pissutsilluunniit aallaavigalugit inissinneqarsimangillat.

Tassungalu atatillugu Akileraarusiinermik aalajangiisartunit Eqqartuussivimmi qullersaasumi tunngavilersuutigineqartoq ima issuarnilik innersuussutigineqarpoq: ”Pisortatigoortumik akileraartarnermut inatsimmi allaniluunniit inatsisini aalajangersaasiortoqarsimangilaq, erniaqartitsineq eqqarsaatigalugu akileraarutinut akiliinissap avaqqunneqarsinnaaneranut atatillugu, tassa atukkisup nammineerluni ernialiusaanut akileraaruseriaaseq eqqarsaatigalugu, inisseeriaaseq tamanna akileraartarnermut inatsimmut ilaginnaasutut isigineqarsinnaanera.”

Danmarkimi Eqqartuussiveqarfiit qullersaat peqqusiorsimavoq akileraarusiinermut inatsimmi §2-mik ilassuteqartoqassasoq (Lov nr. 432 af 26/06/1998), taannalu Kalaallit Nunaanni Aningaasarsianit akileraarutit pillugit inatsimmi 2017-imi Inatsisartut Inatsisaattut eqqunneqarsimasumi §36 a assigivaa (Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. 11. 15. november 2007-imeersoq).

Kisiannili eqqaaneqareersutut § 36 a tassaavoq Kalaallit Nunaanni aningaasarsianit akileraarutit pillugit inatsit aatsaat atorneqarsinnaasoq niuerneq Kalaallit Nunaata nunallu allat iluini ingerlanneqarsimappat.

Eqqaaneqareersutullu apeqqusernarpoq susassaqaqatigiit iluanni niuertoqarsimatillugu akileraarutinit nalunaarsuisoqarsimaneranut atatillugu pineqaatissiisoqarsimanerani akigititatut atugassarititaasunullu inissiinissaminut suut Eqqartuussiveqarfiup qullersaata aallaavigisimaneeraat.

Allannguutissatullu siunnersuutip inatsisitigit attuumavallaannginnissamut periuseq aallaavigalugu niueqatigiittoqarnissaa tunngavilersussavaa, taamaattumillu akileraarusiinnermut aqutsisoqarfimmi susassaqaqatigiit iluminni niueqatigiissimatillugit akigititaasut atugassarititaasullu inissinneqarsimasut arlaatigut aaqqiissuteqarfigerusussappagit arlaannaatigulluunniit qularnartoqarunnaassaaq.

Taamaattumillu § 36 a-mut allannguuteqartoqarnissaanut siunnersuusiortoqarpoq, aammalu inatsisitigit tunngavilersuisoqarusulluni inatsit § 36 a Kalaallit Nunaata iluani niueqatigiittoqartillugu aamma atuuttoq.

Aalajangersakkap taassuma siunertarisimavaa akileraarutinit akisussaaffiup Kalaallit Nunaannit avammut nuunneqarsinnaannginnera. Aalajangersagarlu aamma taanna aallaavigalugu avaqqunniarneqarput piginneqatigiiffimmi piginnittuunerpaaq ingerlatseqatigiiffiillu iluminni niueqatigiitsillugit naleqqutinngitsunik isumaqatigiissusiornerit. Allannguutissatullu siunnersuummik anguniarneqarpoq Akileraartarnermut Aqutsisoqarfiup akit eqqortut atorneqarnissaanut inissiisinaanissaminut qulakkeerinnissinnaanngornissaa, taamaasillunilu suliffeqarfissuit Kalaallit Nunaata iluaniittut aammalu Kalaallit Nunaata nunallu allat iluminni isertitarisimaneqartutut nalunaarusiortoqarnerani eqqortunik nalunaarusiortoqarnissaa.

§36 a-p allanneqarnera maannamut atuuttumut §36 a-mut assut assinguvoq. Taamaallaalliuna ersarissarneqarsimasoq aalajangersagaq Kalaallit Nunaata iluani avataanilu niuernernut atuuttuusoq. Inatsimmilu allassimasut atuaruminarsaaneq eqqarsaatigalugu aammalu innersuussisoqarsimanerani aaqqiissuteqarfigineqarsimaneera kisimik allannguutaasimallutik.

Aammattaaq allannguutissatut siunnersuummi inatsimmi allaqqasumik allannguisoqarsimavoq Kommuneqarfik Sermersuup KANUKOKA-mit anisimaneranut atatillugu aaqqiissuteqartoqarnerani.

Tusarniaaneq

Allannguutissatut siunnersuut 2. maj-4. maj 2017-imi ukununnga tusarniaassutigineqarpoq:

Sulisitsisut (GE), Deloitte, Grønlands Revisionskontor aamma Nunatsinni Advokatit (Grønlandske Advokater).

Sulisitsisut tusarniaanermut akissummik nassiussipput.

Tulliuttumi tusarniaanermut akissutit naalisarlugit uteqqinneqarput. Naalakkersuisut oqaaseqaataat uingasumik allanneqarput.

Sulisitsisut

GE-p nalilerpaa, § 36 a, imm. 1 aamma 2-mik allannguineq pisariaqanngitsoq, aktiaateqarluni ingerlatseqatigiiffiit pillugit inatsimmi allassimareermat, ingerlatseqatigiiffiit qanittut pissutsini tamani attuumavallaannginnissamut periuseq atussagaat.

Aalajangersagaavorlu atuutitissallugu Akileraartarnermut Aqutsisoqarfimmut ajornakusoorujussuussasoq, aningaasanik illuartitsiffigineqanngippat.

GE-p innersuutigissavaa, aalajangersagaq peerneqassasoq.

Oqaatigineqassaaq, ingerlatseqatigiiffiit pillugit aamma akileraartarney pillugu inatsisit assigiinngitsuummata assigiinngitsunillu siunertaqarlutillu atuuffeqarlutik. Soqutigisaqartut, niuerfimmi atukkanik malininngitsut akornanni niuernernik avaqqussisinnaanermut akileraartarnermut ingerlatsiviup piginnaatitaanera, aningaasarsianit akileraarutit pillugit Inatsisartut inatsisaanni aalajangersarneqarpoq.

Sulisitsisut pissutissaqarsorinngilaat oqaasertaliineq ”isumaqatiginninniareernermit”-mit ”tusarniaareernermit”-mut allanngortinneqassasoq, kommuninut ataatsimut akileraarutit aalajangersarneqarnerinut kommunit sunnuteqarsinnaanerat naleqqummat.

Oqaaseqaatit allannguinnissamut pissutissiinngillat. Kommuninut ataatsimut akileraarutit procentianik aalajangersaasarneq pillugu ullumikkut kommunit sunniisarnerannik aalajangersagaq annikillisaassanngilaq. Aalajangersakkamik oqaasertaliineq siunnersuutigineqartoq, kommuninut ataatsimut akileraarutit pillugit aalajangersaasarnermi suleriaatsimut tulluarsarneqarpoq.

Inatsisissatut siunnersuummik tusarniaaneq ullunik marluinnarnik piffissalerlugu tuaviortumik tusarniaatigineqarpoq, tamanna tusarniaaffigisat siunnersuummik sukumiinerusumik naliliinissaannut naammaginartumik isiginiaanerunngilaq.

Tamatumunnga tunngatillugu oqaatigineqassaaq, ataatsimiinnerup nalaani allannguutissatut siunnersuutit sivikitsuarsuararmik tusarniutigineqartarneri pissutigalugit, arlalissuartigut allannguutissatut siunnersuutit tusarniutigineqarneq ajormata. Allannguutissatut siunnersuutip matuma tusarniutigineqarneranut pissutaasimavoq, tusarniaaffigisat

imarisaanut naliliinerat kissaatigineqarmat. Allannguutissatut siunnersuut akileraartarnermut aalajangiisartut sulisarneranni ernianik aaqqiisarnermut tunngavoq, tamanna inatsisissatut siunnersuummut atatillugu Naalakkersuisunit eqqumaffigineqalersimalluni.

Allannguutissatut siunnersuutimmi taakkartorneqartunut ataasiakkaanut oqaaseqaatit

Nr. 1-mut (Inatsimmi § 36 a, imm. 1- 2)

Nr. 01-imut

Inatsisip imaa maannamut § 36 a-mi atuuttup assigivaa.

Taamaakkaluartorli inatsimmi ersarissarneqarsimavoq Kalaallit Nunaata iluani susassaqaqatigiit iluminni niueqatigiitsillugit, inatsit una aamma atuutsinneqartoq.

Imm. 1-imut

Akit atugassarititaasullu niueqatigiinnermi isumaqatigiissutigineqartut, isertitsissutigineqartullu nalunaarutigineqarnerani, taakkua tassaassapput aamma susassaqaqatigiinngikkaluarluni niueqatigiittoqartillugu aningaasarsianit akileraarutigineqartussat isertissimasaat:

- 1) inunnit inatsisitigullunniit akisussaassuseqartumit aalajangiisuusumik sunniuteqarfigineqartuusut imaluunniit
- 2) inatsisitigut akisussaassuseqartuusunut aalajangiisuusumik sunniuteqartuusut imaluunniit
- 3) inummik inatsisitigut pisussatitaasumik suliffeqarfissuarmut attaveqartut, imaluunniit
- 4) nunani allani aalajangersimasumik ingerlatsiviutilik, imaluunniit
- 5) inuk inatsisitigullunniit pisussaataitaasoq nunami allamioq Kalaallit Nunaanni aalajangersimasumik ingerlatsiveqartoq

Aalajangersakkami pineqartut tassaapput inuit taakkartorneqartut aammalu inatsisitigut pisussaataitaasut. Tassalu inuit taakkartorneqartut tassaasinnaavoq aktiaatillit, piginneqatigiiffinni piginnittoq, aammalu inuit taakkuusinnaapput suliffeqarfiutillit. Aammattaaq inatsit soqutigisalinnut kommandititsinullu atuuppoq, tassami soqutigisallit kommandititsillu piginneqatigiissutigisaaq aallaavigalugit akileraarutinut akiliisussaagami. Inatsisitigullu inunnut pineqartut tassaapput aktiaatileqatigiiffiit, piginneqataaffiit, piginneqatigiiffiit aammalu peqatigiiffiit, aningaasaateqarfiit assigisaalu.

Inatsit eqqartorneqartoq inuussutissarsiuteqarnermut attuumassuteqartut iluini aamma soqutigisaqaqatigiinnut atuuppoq. Tigussaasunik pisunik aallaaveqartoqarsinnaavoq, assersuutigalugu imaasinnavaoq, illuatungeriit marluk iluminni naliliinermi akileraarutinut arlaatigut aporaaffiusoqanngitsumi aamma soqutigisat aallaavigineqarsimannigitsut maleruagassallu nr. 1-imiit 5-imut atorneqarsimannigitsut. Taamaasiortoqarsimassappallu

akileraartarnermut aqutsisoqarfik pisussaatitaassaaq assersuutigalugulu naliliineq aaqqiissuteqarfigisinnaallugu, tassani soqutigisaqaqatigiinneq aallaavigalugu inissiisoqarsimanera tunngavigalugu, imaluunniit paarlaaqatigiittoqarnissaani agguaaqartillugu illuatungeriit iluminni soqutigisaqarfitik aallaavigalugit aaqqiissuteqarsimappata. Inatsisissatullu siunnersuummi uani siunertaanngilaq tamanna allannguuteqartinnissaa.

Aalajangersakkami pineqartut tassaapput niueqatigiinnerit nakkutigineqarsinnaasut illuatungeriit iluminni arlaatigut attaveqaqatigiissimaneri. Assersuutigalugulu kiffartuussinernut, attartugassarsisitsinernut, pigisani nalilinnik nuussinermut, pigisat nalillit tigussaasuunngitsut tunniunneqaqqinnerannut assigisaanullu attuumassusillit.

Ingerlatseqatigiiffiup Kalaallit Nunaanni inissisimasup aammalu nunani allani qullersaqarfiup iluminni soorluttaaq ingerlatseqatigiiffiup nunami allami inissisimasup Kalaallit Nunaannilu qullersaqarfillip iluminni niueqatigiinnerannit attuumavallaannginnissamik periuseq atorlugu niueqatigiinneq ingerlanneqartassaaq.

Taava taakku soqutigisaqaqatigiit illugiit iluminni isumaqatigiissimagunik erniartaqanngitsumik aningaasanik atortitsisoqassasoq, niueqatigiinnerli susassareqatigiinnngitsunit ingerlanneqarsimagaluarpat tamanna isumaqatigiissutaanavianngikkaluarpat, taava akileraartarnermut aqutsisoqarfimmit erniaqartitsinermut pissutsit atuutsinneqartut aallaavigalugit ernialersuisitsisoqarsinnaavoq. Atortitsisoq pisussaalissaaq ernianit isertitani akileraarutigissallugit, atortorlu ernianut aningaasartuutigisaminut akileraarusigaanngitsunik ilanngaatsissinnaalissalluni. Atortoq qiviassagaanni taamaasiortoqarnerani ernialersuinerup iluani ernianut akilersuissannginnerminut iluanaaruteqassaaq. Suliffeqarfiilli pineqartut tassaassappata piginneqatigiiffissuup piginneqataaffigisaa allamit ingerlanneqartoq taakkualu iluminni aningaasanik atortitsisoqarsimappat aningaasanillu atortitsisoq piginneqatigiiffissuussalluni, taava erniaqartitsinermut pisussaaffik akileraarutigineqartussatut tapitut isigineqassapput.

Ingerlatseqatigiiffiit, peqatigiiffiit aningaasaateqarfissuit assigisaalu kalaallit akileraartarnermut inatsisaat aallaavigalugit akileraarutinut akiliisussaatitaanngitsut, taamaakkaluartorli suliffiuteqarnermut inatsisit, suliffittut isumaqatigiissutit imaluunniit peqatigiiffittut malittarisassat aallaavigalugit aalajangersarneqarpata, taava taanna inuttut inatsisitigulluunniit pisussaaffeqartutut isiginiarneqassaaq.

Aalajangersakkallu uuma siunertarivaa kattuffiit avataaniit isiginiassagaanni ataasiusutut isigineqartussat, aalajangersakkamit uuminnga malitaqarnissaat. Aalajangersakkamili uani ilaanngitsut tassaapput susassaqaqatigiinnngitsut piginneqatigiit ataatsimut inatsisitigut pisussaatitaasumik piginneqatigiissimagunik, taakkualu avataaniit isigalugit immikkut susassaqarunik aammalu pineqartup arlaat toqqaannartunik inatsisitigut inummik taassuminnga piginneqatigiiffiusumi piginneqataasimappat.

Suliffeqarfittut inatsisit tassaapput piginneqatigiiffinni kommandidaktiskimik selskapiusuni inatsisaasut (piginneqatigiinneq), taakkualu inatsisaassapput inatsisitigut eqqartuussiveqarnermit tunngaveqartumik nassuiaatit, assersuutigalugu kommanditselskabit aammalu soqutigisaqarfiit. Suliffeqarfittut inatsisit taakkua aamma inatsisaasinnaapput avataaneersut, assersuutigalugu tuluit inatsisaat "The Limited Partnerships Act 1907"-i, tassanilu Limited Partnership sinaakkusersorneqarpoq, taannalu amerlasuutigut qallunaat kommanditselskabinut atatillugu inatsisaannut assinguvoq.

Sutigut suliffeqarfittut inatsit aallaavigalugu aalajangersaasoqartinnagu, taava suliffeqarfimmi attuumassuteqartut suliffeqarfimmi isumaqatigiissut aammalu peqatigiiffimmi maleruagassat aallaavigineqartut tunngavigalugit sinaakkusiisoqassaaq. Tunngavigineqartullu taakku avataani, isumaqatigiissusiortartuni oqartussallu iluini nalinginnaasuupput.

Ingerlatseqatigiiffik assigisaalu aalajangersakkamut uunga attuumassuteqarput ingerlatseqatigiiffittut isumaqatigiissut allakkatigut oqaluunnikkuinnarluunniit isumaqatigiissutigineqarsimappat. Ingerlatseqatigiiffittummi isumaqatigiissutaasussaasumi arlaatigut aalajangersimasumik isikkussamik piunasaqaateqartoqanngimmat. Aalajangersakkamullu tassunga attuumassuteqartut tassaapput piginneqatigiiffiit, kommanditselskabit, soqutigisaqarfiit aammalu Kalaallit Nunaanni avataanilu ingerlatseqatigiiffiit allat assingusut, taakkualu qanorluunniit ingerlatseqatigiiffittut akileraartarnermut akiliisussaataasutut isigineqanngikkaluarunik aalajangersakkamut tassunga attuumassuteqarput. Peqatigiiffiit ataatsimut isigalugu akileraartussaataanngitsut aalajangersakkamut uunga attuumassuteqassapput peqatigiiffiit arlaatigut inunnit inatsisitigulluunniit akisussaassuseqartumit aalajangiisuusumik sunniuteqarfigineqartuusutut inissisimassagunik.

Imm. 2-mut

Piunasaqaataavoq aningaasarsiat akileraarutaasussat arlaatigut inunnit inatsisitigulluunniit akisussaassuseqartumit aalajangiisuusumik sunniuteqarfigineqartuusunit nakkutigineqassasut imaluunniit inatsisitigut pisussaataasooq nakkutigineqassasooq. Nakkutiginninneq piginneqataasutut imaluunniit qinersisinnaassuteqartutut paasineqassaaq.

Piginneqatigiiffissuaq piginneqatigiiffigisamini allanit aqunneqartumi nakkutilliisutut isigineqassaaq toqqaannartumik ersinngitsumilluunniit piginneqatigiiffiup 50 procentianit annermik piginnittuuguni, imaluunniit piginneqataassut toqqaannartumik ersinngitsumilluunniit qinersisussat 50 procentiinit annertunerusunik aqutsisuuguni. Tassanilu aamma apeqqutaanngilaq piginneqatigiiffissuup nammineerluni piginneqatigiiffik allanit aqunneqartoq pigigaluarpagu. Nakkutilliisussaataanerlu atuutsinneqartarpoq suliffissuaqarfiup piginneqatigiiffiillu allanit aqunneqartut akornanni arlalinnik ingerlatseqatigiiffeqaralarpat.

Pigineqatigiiffissuup piginnittoqataaffini nakkutiginerai nalilersorniartillugit aktiat aammalu suliffeqarfissuup (pigineqatigiiffinnilu allani), aktiaatillip qanigisaata imaluunniit aningaasaateqarfiit suliffeqarfiilluunniit unammilleqatigiinneq killilerniarlugu peqatigiiffigisaani qanoq qinersisinnaassuseqartiginersoq isigineqartarpoq.

Pigineqataaffimmik nakkutilliisuunerup nalilersorniarneqarnerani taamaallaat aktiaatit imaluunniit aktiaatillit qinersisinnaanannerannik aqutsisinnaaneq kisimi imaluunniit aningaasaateqarfiit suliffeqarfiilluunniit unammilleqatigiinneq killilerniarlugu peqatigiiffigisat pilersitseqataasimasut kisimik isiginiarneqartarput imaluunniit paasiniaraanni kiap pigineqatigiiffik nakkutilliiffigisassarineraa, taava aamma isiginiarneqarsinnaasup aappaa tassaavoq pigineqatigiiffissuup aningaasaateqarfinnik imaluunniit suliffeqarfimmi unammilleqatigiinneq killilerniarlugu peqatigiiffinnik pilersitseqataaffigisimasaat. Qanigisatut isiginiarneqartut tassaapput aktiaatillip katissimasaa, angajoqqaava, aanaakkui aataakkui aammalu meerai ernutaalu taakkualu katissimasaat aammalu taakkartorneqartunik kingornussisussat. Qitornassat qitornavissiallu ilaquuttatut nalinginnaasutut isiginiarneqartarput.

Pigineqatigiiffik D1 nakkutiginiarneqartarpoq pigineqatigiiffissuarmit M-imiit, tassani M-i allamik pigineqataaffigisani peqatigalugu, D2, pigineqatigiiffimmi tassani 50 procentimit annerusumit D1-imi piginnittuugunik.

Taamaakkaluartorlu pigineqataaffigisap pigineqataassutaani pigineqataassutit kisimik isiginiarneqartarput. Tassa imaappoq pigineqataaffigisap D2-p pigineqataaffigisai nammineerluni pigisai isiginiarneqassanngitsut.

M-i nammineerluni D2-mi pigineqataassutsit tamarmik piginnigippagit, taava pigineqataassuseq aallaavigalugu D2-p pigineqataassutai kisimik naatsorsuutigineqarsinnaapput. Assersuutigalugu M-i D2-mi 80 procentimik pigineqataasuuguni D2-lu D1-imi 80 procentinik pigineqataasuulluni, taamaattumillu M-i D1-imi nakkutilliisutut isigineqassalluni D1-imi 64 procentimik pigineqataassuteqarami (80 procentip 80 procentia).

Kisiannili M-i 70 procentimik D2-mi piginnittuusuuguni, D2-lu D1-imi aamma 70 procentimik pigineqataasuulluni, taava M-i D1-imi nakkutilliisussatut isigineqarnaviannigilaq 70 procentip 70 procentia 49 procentiugami.

Qinerneqarneq aallaavigalugu nakkutilliisussamik toqqaaniarnermi, pigineqatigiiffissuaq nammineerluni imaluunniit pigineqatigiiffiit nakkutilliisuuffigisani aqqutigalugit imaluunniit pigineqatigiiffiit nakkutilliisuuffigisani peqatigalugit selskabimi pineqartumi qinersinerit 50 procentit pigigaanni, taava pigineqatigiiffissuaq nakkutiginnittunngusaaq.

M-i D1-imi qinersisinnaasut akornanni qinersinissamik toqqaannanngitsumik aqutsisuuguni, tassa M-i D2 aqqutigalugu D1-imi qinersisussanik aalajangiisinnaaguni, taava tassani

apeqqutaassaaq M-i ilumut D2-p D1-imi qinersisinnaassusiinut qanoq qinersissaneranut aalajangiisinaanersoq. M-i D2-mi qinersisinnaasut 50 procentii sinnerlugit aalajangiisussaasuuguni, taava D1-i kimit nakkutigineqassanersoq paasiarniartillugu D2-mi qinersisinnaassutsit tamarmik M-ip qinersisinnaassutsit isiginiarneqassapput.

Pineqartumi M-i D2-mi qinersisinnaasut 70 procentii aalajangiisussaaffigippagit, D2-lu D1-imi qinersisinnaasut 70 procentii aamma aalajangiisussaaffigalugit, taava M-i nakkutilliisinaassusermik tunineqassaaq D1-imi qinersisinnaassuseqartut isiginiarneqarnerani.

Taamaakkaluartorli aamma eqqarsaatigineqartariaqartut ilagaat aktiaatillit aallat qinersisinnaassuseq allatut atorsinnaammassuk. Assersuutigalugu aktiaatilinnut isumaqatigiissut malillugu aktiaatillit arlaatigut qinersisinnaatitaanngikkunik imaluunniit qinersisinaanerat pisussaajunnaarsinneqassappat, taava M-ip D1-mi qinersisinnaasut 50 procentiinit annertunerit ilumut aalajangiiffigisinaaneraat nalilersorneqassaaq.

Assersuutigalugu M qinersisinnaassutit D1-imi malittarisassaasut aallaavigalugit 45 procentiinnaat aalajangiiffigisinnaappagit, taavalu D1-imi aktiaatillit arlallilluunniit aktiaatillit isumaqatigiissutaat malillugu qinersisinnaatitaanngippata, taava M-i D1-imi nakkutilliisussatut isigineqassaaq. Taamaattoqarneranullu peqqutaavoq qinersisinnaasut kisimik aalajangiisuummata.

Toqqaannanngitsumik oqaaseq ilaatinneqarpoq aktiatigut piginneqatigiiffiit qinersisinnaassutsillu aallaavigalugit sorleq nakkutilliisussaataitanersoq nalilersorniartillugu selskabit Kalaallit Nunaanneersut avataaninngaanneersunilluunniit pigineqaraluartulluunniit isiginiarneqartarmata.

Aalajangersagaq aamma una atuutissaaq, assersuutigalugu aningaasaateqarfik arlalinnit aqunneqaralaruni, aqutisullu taakkua ataatsimut isumaqatigiissutigisimagunikku piginneqatigiiffigisaq ataatsimut ingerlanneqassasoq. Taamaattumik siunnersuutigineqarpoq, aningaasaateqarfiup nakkutilliisussaataitanersoq misissornerani, aamma misissorneqassasoq aningaasaateqarfimmi isumaqatigiissuteqarnikkut nakkutilliisooqataaffiusumi aqutseqataasut pigisaat misissorneqassasut. Aammattaaq siunnersuutigineqarpoq aalajangersagaq una atuutsinneqassasoq aktiaateqarfinnut nammineerlutik akileraarutinut pisussaaffiligaasunut. Taamaattumik Transfer Pricingimi inatsisit atuutsinneqassapput, ingerlatseqatigiiffiit marluk ingerlatseqatigiiffimmi allami piginneqatigiiffigisaminni (50/50) iluminni isumaqatigiissimagunik nakkutilliisooqatigiissallutik.

Tassanilu nalilersorluarneqartariaqarpoq ataatsimut nakkutilliisussatut ilumut isumaqatigiissusiortoqarsimanersoq. Nalilersuinermilu tassani misissorneqarsinnaavoq isumaqatigiissummi ukua ilaanersut:

- qinersisinnaassutini aalajangeeqatigiissinnaatitaaneq,
 - ingerlatseqatigiiffimmi aqutsisut pingaarnerit iluanni ataatsimut qinereqatigiinneq suliunnaarsitseqatigiinnerlu ataatsimut aalajangeeqatigiinneq imaluunniit
 - ingerlatseqatigiiffiup ingerlanneqarneranut aammalu aningaasaqarneranut atatillugu ataatsikkut aqutseqatigiinneq.
- Ataatsimut aningaasaleeqatigiittoqarniartillugu nalinginnaasumik immikkoortoqarfinnut aalajangersimasunut ataatsimut malittarisassanik isumaqatigiissusiorortoqartarpoq, assersuutigalugu aktiaatillit isumaqatigiissusiarisartagaat. Tassanilu pineqartut tassaasinnaapput:
- Minnerpaamik aningaasaliisoqarnissaanut/piginneqataaffigineqartussanut minnerpaaffissatut piumasaqaat aammalu siunissami piginneqatigiiffiup pisineratigut piginneqatigiiffiup allineqarnissaanut peqataanissaq.
 - Aktiaatilittut tuniniaanissamini aktiaatilittut allatulli tuniniaasinnaatitaaneq aammalu aktiaatilittut tuniniaanissami aktiaatilittut allatulli tuniniaasussaataitaaneq (periuiseq along & drag along).
 - Aningaasaleeqataaniarnermi suleriesissatut pilersaarusiame isumaqatigiinneq (aningaasaliinerup isikkua aammalu aniinnarniarnermi qanoq iliortoqarsinnaaneranut atorusat).
 - Siulersuisussanik siulersuisullu atuuffissaanni aalajangeeqatigiinneq (aalajangersakkat, taakkunanilu tasaanerusarput siulersuisut ataatsimiinnissanut, amerlassutissanut, amerlanerussuteqartutut inatsisit, aalajangiissutissanut aaliangersimasunut amerlanerussuteqartoqarnissaanut piumasaqaatit assigisaalu).

Aktiaatillit isumaqatigiissutaat kisiat aallaavigalugu oqartoqarsinnaanngilaq piginneqatigiit iluminni nakkutilliisoqatigiinnissamik isumaqatigiissusiorsimasut. Aktiaatillillu isumaqatigiissutaat ilaanni aamma assersuutigalugu aalajangersagaqarpoq, tuniniaasoqarnissaani piseqqaartussaataitaaneq aammalu sallunaveqqusiorortoqarnerani killiliisinnaatitaaneq. Aalajangersakkat taakkua isumaqanngillat ataatsimut nakkutilliisussatut isumaqatigiissusiorsimaneq.

Nr. 2-mut (Inatsimmi § 63, imm. 2)

Nr. 02-mut

Aalajangiussami uani kommuneqarfiit akileraartarnermut ataatsimut akileraarutissanik inissiinissamut periutsimut attuumassuteqarpoq. Allannguutissatullu siunnersuut pilersinneqarsimavoq Kommuneqarfik Sermersuup KANUKOKA-mit ilaasortaajunnaarsimanera kingorna.

Aammattaarlu siunnersuummi oqariartaaseq – ”isumaqatigiissusioqatigisimaneranit” ”tusarniaavigisimaneranit”-imik taarserneqarpoq. Oqariartaatsillu taassuma

allannguuteqartoqarnissanut tunngaviusoq tassaavoq ullutsinni pineqartumi tassani pissutsit qanoq ineriartorsimanerat.